



Fegl d'infurmaziun concernent l'obligaziun da sustegn en cas d'ina midada da domicil

1 Basas giuridicas e directivas

- Art. 4 al. 1, art. 9 al. 1, art. 12 al. 1 da la lescha federala davart la cumpetenzza per il sustegn da persunas basegnusas (lescha federala da sustegn, LSus; CS 851.1)
- Art. 5 al. 1 da la lescha davart il sustegn da persunas basegnusas (lescha chantunala da sustegn; DG 546.250)
- Art. 1 da las disposiziuns executivas tar la lescha chantunala da sustegn (DEtLS; DG 546.270)
- Cifra B.3 da las directivas per la concepziun e per la calculaziun da l'agid social (directivas da la COSAS)

2 Giurisdicziun

- Sentenzia da la dretgira administrativa dal chantun Grischun dals 8 d'october 2014 (sentenzia 14 54)

3 Situaziun da partenza

En sia sentenzia 14 54 dals 8 d'october 2014 ha la dretgira administrativa dal chantun Grischun fixà che l'organ d'agid social vertent stoppia conceder il sustegn public necessari – sin basa dal dretg chantunal – in mais pli ditg en cas d'ina partenza. Areguard las dumondas giuridicas ha la dretgira constatà ch'il domicil da sustegn tenor l'art. 12 LSus en cumbinaziun cun l'art. 5 al. 1 da la lescha chantunala da sustegn saja crudà davent en quest cas en la veglia vischnanca pervia da la partenza en ina nova vischnanca. L'obligaziun da sustegn da la veglia vischnanca existia dentant anc vinavant per in ulteriur mais. En quest connex sa basia la dretgira administrativa sin las directivas da la COSAS. La dumonda, sch'er l'obligaziun da sustegn da l'autorità d'agid social vertenta n'extingua betg gia cun la partenza, mabain pir a la fin dal mais suandant, en cas che la persuna sustegnida giaja a star en in nov chantun da domicil, nua che las directivas da la COSAS na vegnian betg applitgadas, ha la dretgira administrativa laschà avert en quest cas (cf. sentenzia 14 54, consideraziun 3 d).

Sut il titel "Cumenzament e finiziun da relaziuns da locaziun" menziunescha la cifra B.3 da las directivas da la COSAS tranter auter che l'organ d'agid social vertent na paja per regla betg mo ils tschains da locaziun, mabain er las ulteriuras prestaziuns da sustegn durant l'emprim mais suenter la partenza.

4 Recumandaziun

L'uffizi chantunal dal servetsch social ha elavurà la suandanta recumandaziun per garantir en il chantun ina pratica uschè unitara sco pussaivel en connex cun l'obligaziun da sustegn en cas d'ina midada da domicil.

4.1 Midada da domicil entaifer il chantun

Sin basa da la sentenza da la dretgira administrativa 14 54 dals 8 d'october 2014 èn applitgables las directivas da la COSAS areguard la dumonda dal mument che l'obligaziun da sustegn passa a la nova autoritad en cas d'ina midada da domicil. Sche la persuna sustegnida mida domicil entaifer il chantun, è l'autoritad d'agid social vertenta responsabla per il tschains da locaziun e per las ulteriuras prestaziuns da sustegn per il mais suandant.

4.2 Midada da domicil ordaifer il chantun

Sche la persuna sustegnida va a star en in auter chantun, recumonda l'uffizi chantunal dal servetsch social ch'i vegnian applitgadas las directivas da la COSAS resp. che l'autoritad d'agid social vertenta surpiglia il tschains sco er las ulteriuras prestaziuns da sustegn per il mais suandant en quels cas che las directivas da la COSAS vegnan medemamain applitgadas en il nov chantun da domicil da la persuna sustegnida. En ils ulteriurs cas passa l'obligaziun da sustegn cun effect immediat a la nova vischnanca da domicil.

Istorgia da las versiuns dals documents

Manual	Data	Versiun	Motiv da la midada / remartga
Chapitel B	25 da mars 2019	1.0	Emprima versiun
Chapitel B	15 da matg 2019	1.1	Adattaziun dal layout